

# PLAN ANUAL 2022

## DA COOPERACIÓN GALEGA

**Dirección Xeral de Relacións Exteriores e coa Unión Europea  
Vicepresidencia Primeira e Consellería de Presidencia,  
Xustiza e Turismo**

(Este Plan recibiu o informe favorable do Consello Galego de Cooperación para o Desenvolvemento o 20 de xaneiro de 2022 e foi aprobado polo Consello da Xunta de Galicia o 3 de febreiro de 2022)

## **ÍNDICE**

### **1. INTRODUCCIÓN**

### **2. ÁMBITOS ESTRATÉXICOS DAS ACTUACIÓNS NO EXTERIOR**

### **3. PRIORIDADES XEOGRÁFICAS, TRANSVERSAIS E COLECTIVOS PRIORITARIOS**

#### **3.1 PRIORIDADES XEOGRÁFICAS E TRANSVERSAIS**

#### **3.2 COLECTIVOS PRIORITARIOS**

### **4. CUMPRIMENTO DOS COMPROMISOS ADQUIRIDOS EN ANOS ANTERIORES**

### **5. NOVAS ACTUACIÓNS PARA O ANO 2022**

#### **5.1 CONVOCATORIAS PÚBLICAS EN RÉXIME DE CONCORRENCIA COMPETITIVA**

#### **5.2 CONVENIOS DE COLABORACIÓN CON ENTIDADES**

#### **5.3 PLAN ANUAL DE AVALIACIÓNS**

#### **5.4 ACTIVIDADES DIVULGATIVAS E FORMATIVAS**

#### **5.5 OUTRAS ACTUACIÓNS**

#### **5.6 COORDINACIÓN INSTITUCIONAL**

### **6. ORZAMENTO 2022**

## 1. INTRODUCCIÓN

O Plan anual 2022 da Cooperación Galega preséntase en cumprimento do mandato legal establecido no artigo 83.4 da Lei 10/2021, do 9 de marzo, reguladora da acción exterior e da cooperación para o desenvolvemento de Galicia, que sinala que o órgano de dirección da Administración competente en materia de cooperación para o desenvolvemento elaborará un Proxecto de plan de acción anual, que se someterá á aprobación do Consello da Xunta de Galicia. Pola súa parte o artigo 87.2 da Lei establece que este Plan de acción anual será aprobado por proposta da conselleira ou conselleiro competente en materia de cooperación para o desenvolvemento e logo do informe do Consello Galego de Cooperación para o Desenvolvemento.

No ano 2021 o Consello Galego de Cooperación para o Desenvolvemento e o Consello da Xunta de Galicia aprobaron a *Estratexia de resposta á COVID-19 da Cooperación Galega*. Este documento estratéxico tiña como finalidade adaptar o IV Plan director da Cooperación Galega ao contexto provocado pola pandemia da COVID-19 nos países socios. A Estratexia de resposta á COVID-19 da Cooperación Galega foi dada a coñecer ao Parlamento de Galicia o 7 de abril de 2021 a través da comparecencia parlamentaria en comisión do director xeral de Relacións Exteriores e coa UE.

A día de hoxe a pandemia segue condicionando as demandas e necesidades das comunidades socias e dos axentes de cooperación, o que xustifica a continuidade da vixencia no 2022 desta *Estratexia de resposta á COVID-19 da Cooperación Galega*.

Na propia Estratexia estableceuse que, se a situación de pandemia se alongase, consensuaríase cos axentes de cooperación a posible prolongación da súa vixencia para 2022 e, polo tanto, a prórroga do IV Plan director.

No Plan anual 2022 recóllense os compromisos, os medios de actuación e os recursos orzamentarios que o Goberno galego pon a disposición da cooperación para o desenvolvemento para o ano 2022, de acordo coas

orientacións establecidas no IV Plan director que está adaptado ao contexto marcado pola pandemia da COVID-19, que ten ocasionado unha crise de saúde, económica e social a nivel mundial.

No presente documento **relaciónanse só as actuacións que se van a financiar no marco do programa orzamentario 331A: Cooperación Exterior e ó Desenvolvemento** da Dirección Xeral de Relacións Exteriores e coa UE (en diante DXRREE e coa UE), sen prexuízo de que ao longo do ano outros departamentos da Xunta de Galicia poidan desenvolver actuacións en materia de cooperación, cuxa cuantificación se realizará ao final do exercicio.

Para o ano 2022 a dotación total do programa 331A: Cooperación Exterior e ó Desenvolvemento elévase a **7.834.885 €**, é dicir, **386.452 €** máis que a do ano 2021, o que supón un incremento dun **5,19 %** sobre o orzamento total do programa e, á súa vez, **máis do dobre** do que se incrementa o orzamento total da **Vicepresidencia Primeira e Consellería de Presidencia, Xustiza e Turismo**. O incremento impútase na súa totalidade (salvo o incremento anual dos Gastos de persoal) ao **Capítulo VII**, na aplicación **790.0 Axudas cooperación no exterior**.

Os **compromisos de gasto adquiridos** en exercicios anteriores (capítulo IV) para actuacións que están en marcha (**3.396.228,43€**), xunto co compromiso de **gastos de persoal** (capítulo I) da **Subdirección Xeral de Cooperación Exterior** (**584.093 €**), elevan o **orzamento comprometido** para o 2022 a un total de **3.980.321,43 €**, o que supón unha **dotación dispoñible para novas actuacións** de **3.854.563,57 €**.

Como liña xeral, seguirase apostando polas **convocatorias públicas** de axudas como **principal instrumento** de canalización de fondos, co fin de facilitar o concurso en concorrencia competitiva dos distintos axentes de cooperación. Está previsto destinar ás convocatorias sobre un **80 % do orzamento operativo inicial de gasto**. Do mesmo xeito, **primaranse as actuacións das ONGD** na xestión e canalización das axudas.

Un aspecto importante a destacar é que este Plan anual 2022 da Cooperación Galega, e no que respecta ás actuacións no exterior, desenvolverase tomado como base a **Estratexia de resposta á COVID-19 da Cooperación Galega**, de tal forma que os recursos e instrumentos orientaranse de cara a facilitar a loita contra a pandemia e as súas negativas consecuencias que están a afectar gravemente ás comunidades e persoas máis vulnerables.

## 2. ÁMBITOS ESTRATÉXICOS DAS ACTUACIÓNS NO EXTERIOR

Os ámbitos estratéxicos (AE) do Plan 2022 que orientarán as actuacións no exterior serán os que define a Estratexia de resposta á COVID-19 da Cooperación Galega, igual que sucedera co Plan anual 2021:

*AE 1: Afrontar a emerxencia sanitaria apoiando os sistemas e servizos de saúde e aos gobernos, comunidades e organizacións da sociedade civil socias da Cooperación Galega para rematar coa transmisión do virus da COVID-19 e prever e tratar futuras crises sanitarias e pandemias.*

*AE 2: Promover o exercicio dos dereitos sociais básicos (saúde, educación, alimentación, hábitat, auga e saneamento básico) e a cohesión social e reforzar os sistemas públicos de protección social con iniciativas lideradas desde o nivel comunitario e local.*

*AE 3: Mitigar o impacto socioeconómico e salvagardar ás persoas máis vulnerables e ás comunidades locais garantindo os seus ingresos e os seus medios sustentables de vida.*

Con carácter transversal a estes tres ámbitos estratéxicos priorizaranse as actuacións que impulsen a equidade de xénero e o apoderamento e o exercicio de dereitos das mulleres e da infancia, por mor da súa especial afectación a causa da pandemia.

## 3. PRIORIDADES XEOGRÁFICAS, TRANSVERSAIS E COLECTIVOS PRIORITARIOS

### 3.1. PRIORIDADES XEOGRÁFICAS E TRANSVERSAIS

O Plan 2022 respectará as prioridades xeográficas do IV Plan director da cooperación galega (2018-2021) e dará continuidade á atención específica aos países menos adiantados ou cun índice de desenvolvemento humano baixo e ás comunidades e países socios máis afectados pola COVID-19.

As intervencións financiadas no marco deste Plan respectarán as prioridades transversais establecidas no IV Plan director da cooperación (2018-2021): erradicación da pobreza multidimensional, equidade de xénero, defensa da sustentabilidade ambiental e a loita contra o cambio climático, o enfoque baseado en dereitos humanos, o respecto pola diversidade cultural e a promoción da interculturalidade, a equidade e a

loita contra as desigualdades, e a participación cidadá e fortalecemento institucional e da sociedade civil.

### 3.2. COLECTIVOS PRIORITARIOS

Segundo establece a Estratexia de resposta á COVID-19 da Cooperación Galega, as actuacións no exterior prestarán unha atención preferente ás persoas e grupos de poboación en situación de vulnerabilidade ou en risco de marxinación, exclusión ou discriminación que teñan sido máis afectadas pola pandemia.

Estes grupos de poboación coinciden cos colectivos identificados no IV Plan director como prioritarios por mor de atoparse en situación de vulnerabilidade, en risco de marxinación e exclusión ou sendo vítima de múltiples discriminacións e violencias como as mulleres e nenas, adolescentes, persoas traballadoras informais, poboación indíxena ou afrodescendente, minorías étnicas, persoas con diversidade funcional, persoas maiores dependentes, persoas doentes sen recursos, poboación refuxiada ou desprazada, etc.

Con todo, identifícanse a infancia e as nenas e mulleres como colectivos especialmente afectados, aos que se engaden as persoas defensoras dos dereitos humanos e a sociedade civil organizada en contextos de regresión democrática e autoritarismo ou en países onde as medidas sanitarias máis severas para a loita contra a pandemia inclúen a restrición dos dereitos e as liberdades públicas. Xa que logo, durante a situación de pandemia procurárase non deixar a ninguén atrás, pero deberase protexer sobre todo ás persoas e grupos máis vulnerables.

### 4. CUMPRIMENTO DOS COMPROMISOS ADQUIRIDOS EN ANOS ANTERIORES

Cos orzamentos de cooperación para o ano 2022 asegurárase a cobertura financeira dos compromisos adquiridos con anterioridade, que no seu conxunto elévanse a **3.396.228,43 €**, que permitirán **dar continuidade** ás seguintes actuacións:

- **27** proxectos aprobados na **convocatoria do ano 2021 de proxectos no exterior dos axentes de cooperación**, por un total de **2.906.569,43 €** para 2022.

- **13** proxectos aprobados na **convocatoria do 2021 de proxectos de Educación para o Desenvolvemento e a Cidadanía Global**, por un total de **300.000 €** para 2022.
- **5** proxectos aprobados na **convocatoria do ano 2021 de subvencións para proxectos de investigación e para a creación de grupos de investigación en materia de cooperación para o desenvolvemento promovidos polos grupos e centros de investigación das universidades galegas**, por un total de **74.962,00 €** para 2022.
- **6 bolsas de formación** de persoas expertas en cooperación internacional para o desenvolvemento convocadas no ano 2021, cunha dotación orzamentaria de **65.200 €** ata a finalización do período de formación, no mes de setembro de 2022. A este orzamento hai que engadir **2.700 €** para a cobertura da **Seguridade Social** das persoas bolseiras.
- **Convenio** de colaboración con ***Augas de Galicia e a Fundación Universidade da Coruña (FUAC)*** para a execución do proxecto "Fortalecemento de capacidades técnicas e operativas para a mellora da xestión dos recursos hídricos en Mozambique (AQUA-MOZ, 2ª Fase)". Este convenio bianual asinado no 2021 conta cunha dotación de **25.218,75 €** para o 2022, dos que 6.797 € proceden do programa 331A e 18.421,75 € de Augas de Galicia
- **Convenio** de colaboración coas ONGD ***Solidariedade Internacional de Galicia, AGARESO e Asemblea de Cooperación pola Paz*** para a execución do proxecto "**Activistas polo mundo que queremos 2021-2022**" no marco do *Plan Proxecta* da Consellería de Cultura, Educación e Universidade , cunha dotación para o 2022 de **40.000 €**.

## 5. NOVAS ACTUACIÓNS PARA O ANO 2022

Unha vez descontados os recursos para dar continuidade aos compromisos asumidos con anterioridade ao ano 2022, e os gastos de persoal da Subdirección Xeral de Cooperación Exterior, a **capacidade orzamentaria** para acometer **novas actuacións** no ano 2022 elévase a **3.854.563,57 €**.

As **actuacións previstas** para o ano **2022** detállanse nos seguintes apartados:



## 5.1 CONVOCATORIAS PÚBLICAS EN RÉXIME DE CONCORRENCIA COMPETITIVA

### ✓ Convocatorias de subvencións para proxectos de cooperación no exterior das ONGD e outros axentes de cooperación

O obxecto destas axudas é a execución de proxectos no exterior das ONGD, universidades, empresas e organizacións empresariais, sindicatos, comunidades galegas no exterior e outros axentes sociais que teñan a condición de axentes de cooperación.

A **dotación total de ambas convocatorias** será de **5.400.000 €** (2.160.000 € para o ano 2022 e 3.240.000 € para o 2023), o que representa un **incremento** dun **8%** respecto á dotación das convocatorias do ano 2021.

A distribución da dotación de cada convocatoria será a seguinte:

- Para **ONGD: 4.700.000 €** (1.880.000 € no 2022 e 2.820.000 € no 2023).
- Para os **outros axentes: 700.000 €** (280.000 € no 2022 e 420.000 € no 2023).

A distribución dos créditos entre as dúas anualidades é a mesma á de anteriores convocatorias: 40 % para o 2022 e 60 % para o 2023.

### ✓ Convocatoria de subvencións para proxectos de Educación para o Desenvolvemento (ED) e a Cidadanía Global promovidos polas ONGD.

O obxecto destas axudas é a execución de proxectos de **Educación para o Desenvolvemento e a Cidadanía Global** por parte das Organizacións Non Governamentais de Desenvolvemento (**ONGD**), dentro das **catro dimensións** que forman parte da educación para o desenvolvemento:

- a) Sensibilización e concienciación da opinión pública en materia de cooperación para o desenvolvemento e causas da pobreza.
- b) Formación sobre o desenvolvemento e difusión nos ámbitos educativos do coñecemento da realidade dos países empobrecidos e da cooperación para o desenvolvemento.
- c) Investigación sobre o desenvolvemento.



d) Incidencia, participación e mobilización social para crear redes de solidariedade na nosa sociedade.

A **dotación total** da convocatoria do ano 2022 será de **600.000 €** (240.000 € para o 2022 e 360.000 € para o 2023), o que supón un **incremento dun 20 %** na súa dotación respecto á do ano 2021 (100.000 € máis).

✓ **Convocatoria de subvencións para proxectos de Acción Humanitaria**

O obxecto destas axudas é a execución de proxectos de acción humanitaria no exterior, entendendo como tales aqueles destinados a salvar vidas, aliviar o sufrimento, protexer os dereitos fundamentais e manter a dignidade humana durante e despois das crises –provocadas por seres humanos ou por desastres naturais–, así como os destinados á prevención e reforzo da capacidade de resposta para cando se produzan estas situacións e as de protección de vítimas e defensa dos dereitos humanos.

A **convocatoria** terá carácter **anual** e a súa **dotación** será de **400.000 €**, é dicir, a mesma que a publicada no ano 2021.

✓ **Convocatoria de 6 bolsas de formación de persoas expertas en cooperación internacional para o desenvolvemento**

Dende hai anos a Xunta de Galicia fai unha aposta clara para a profesionalización do sector da cooperación galega que redunde nunha mellora da calidade desta, a través do financiamento de bolsas de formación de persoas expertas en cooperación internacional para o desenvolvemento, que permiten ás/aos beneficiarias/os completar a súa formación con estadías, tanto no terreo como na sede da DXRREE e coa UE competente na materia.

Este investimento, dirixido á mellora das capacidades destas persoas, ten un retorno a medio e longo prazo para todo o sistema de cooperación e reforza as relacións entre a Xunta de Galicia e as outras institucións a través das que se articulan estas bolsas, o que leva a facer máis eficaz a cooperación.

Para o ano 2022 convocaranse 6 bolsas, de carácter plurianual, para garantir que as persoas beneficiarias gocen dun ano completo de formación; dúas das bolsas desenvolveranse na sede da DXRREE e coa UE

en Santiago de Compostela e as catro restantes no exterior, nas oficinas técnicas de cooperación da AECID (a convocatoria destas catro bolsas estará supeditada á evolución da pandemia).

O **orçamento previsto** para as bolsas é de **104.600 €** (32.200 € para o 2022 e 72.400 € para o 2023). Esta cantidade supón un incremento do 10,11 % respecto ao orçamento da convocatoria do ano 2021.

A este orçamento hai que engadir **3.600 €** (900 € no 2022 e 2.700 € no 2023) para a cobertura da **Seguridade Social** das persoas bolseiras.

## 5.2 CONVENIOS DE COLABORACIÓN CON ENTIDADES

### ✓ Convenios de colaboración no ámbito da Acción Humanitaria

Ademais da convocatoria anual en concorrência competitiva sinalada anteriormente, prevese asinar os seguintes convenios para a execución de actuacións humanitarias e de emerxencia:

- Convenio de colaboración con **Farmamundi** para actuacións de acción humanitaria e de emerxencia, que permitirá dar resposta rápida e eficaz ante emerxencias, mellorando así a axilidade e eficacia da resposta humanitaria galega, cunha dotación de **50.000 €**.
- Convenio de colaboración con **UNICEF** para actuacións de acción humanitaria e de emerxencia cunha dotación de **50.000 €**.
- Convenio de colaboración coa **Asociación Solidariedade Galega co Pobo Saharauí (SOGAPS)**, co obxectivo de mellorar as condicións de vida da poboación refuxiada saharauí, que terá unha dotación de **100.000 €**.
- Como en anos anteriores, e co fin de promover a presenza da Cooperación Galega na acción multilateral, estableceranse acordos de colaboración con **ACNUR** e **UNRWA** (cos respectivos comités españois), cunha dotación de **30.000 € cada un deles**.
- Prevese ademais subscribir un **novo Acordo de prórroga do convenio asinado no 2018** entre a **Cooperación Descentralizada e a Axencia Española de Cooperación Internacional para o Desenvolvemento (AECID)** para a actuación conxunta e coordinada en materia de acción humanitaria. Este convenio deriva do Acordo Marco asinado no 2013 coa Secretaría Xeral de Cooperación Internacional

para o Desenvolvemento, ten carácter anual (prorrogable) e terá unha dotación para o ano 2022 de **50.000 €** por parte da Xunta de Galicia e de cada unha das CCAA asinantes e de 1.000.000 € por parte da AECID.

Ao longo do ano, e en función das dispoñibilidades financeiras, poderanse asinar outros convenios ou addendas aos convenios mencionados para dar resposta a situacións de emerxencia ou crises humanitarias.

✓ **Convenios de colaboración no ámbito da educación para o desenvolvemento, a sensibilización, a formación e o fortalecemento institucional**

Prevese a sinatura dos seguintes convenios:

- **Convenio de colaboración coa *Coordinadora Galega de ONGD***

En cumprimento do obxectivo de contribuír ao fortalecemento do sector, asinarase un ano máis un **convenio de colaboración** coa ***Coordinadora Galega de ONGD***, como entidade que agrupa actualmente a 45 organizacións con presenza na nosa Comunidade Autónoma e que actúa como representación delas diante das institucións, na defensa do Código de Conduta e na formación, a sensibilización e a incidencia na busca da implicación da sociedade galega na superación da pobreza na que viven millóns de persoas no mundo. Con este convenio estase a contribuír ao incremento da coordinación entre os actores da cooperación galega.

O obxectivo do convenio será, por unha banda, fortalecer o tecido das ONGD galegas e a propia Coordinadora a través de diversas accións, como prestar servizos de información e apoio técnico ás ONGD, asistencia a xuntanzas con institucións, organización de eventos, promoción de mesas de diálogo, etc. e, por outra banda, mellorar a promoción de actuacións en materia de educación para o desenvolvemento e a cidadanía global.

A **dotación financeira** prevista para este convenio en 2022 será de **100.000 €**.

- **Convenio de colaboración co *Fondo Galego de Cooperación e Solidariedade***

Co mesmo obxectivo que o convenio coa *Coordinadora Galega de ONGD*, pero dirixido ao ámbito municipalista, no 2022 asinarase novamente un **convenio co *Fondo Galego de Cooperación e Solidariedade*** como entidade plural (na actualidade agrupa a 98 concellos e ás Deputacións Provinciais da Coruña, Lugo e Pontevedra), comprometida coa idea de cooperar en Galicia para ser máis eficaces na cooperación con terceiros países, impulsando un maior compromiso por parte das entidades locais coa cooperación para o desenvolvemento, nun marco máis estable e permanente.

O obxectivo do convenio será, tomando como referencia a Axenda 2030, sensibilizar, asesorar e apoiar ás entidades pertencentes ao Fondo e dar a coñecer o traballo que desenvolve no ámbito da cooperación municipalista e no cumprimento dos ODS ás entidades socias e á sociedade galega en xeral, así como reforzar a rede humana e organizativa do propio Fondo.

A **dotación financeira** para este convenio para o 2022 será de **60.000 €**.

- **Convenio de colaboración "*Activistas para o mundo que queremos*" no marco do *Plan Proxecta* da Consellería de Cultura, Educación e Universidade**

O **Plan Proxecta** é unha iniciativa de innovación educativa da actual Consellería de Cultura, Educación e Universidade que busca a integración na planificación anual dos centros de programas postos en marcha por entidades alleas ao sistema educativo.

Dende que no ano 2013 a DXRREE e coa UE, en coordinación coa devandita Consellería e no marco do **Plan Proxecta**, impulsara un proxecto piloto titulado "***Cooperación galega: O mundo que queremos***", a través da formalización de **convenios de colaboración con ONGD especializadas no ámbito da educación para o desenvolvemento**, puxéronse en marcha xa 9 edicións de dito proxecto que na pasada edición pasou a denominarse "***Activistas polo mundo que queremos 2021-2022***".

Para o ano 2022 está previsto asinar un novo convenio coas mesmas entidades que no 2021; é dicir, ***Solidariedade Internacional de Galicia***,

**AGARESO e Asemblea de Cooperación pola Paz**, para poñer en marcha unha nova edición (2022-2023) do dito proxecto cunha **dotación prevista** de **70.000 €** (30.000 € para 2022 e 40.000 € para 2023).

- **Convenio bianual de colaboración coas tres universidades galegas para a consolidación da RGCUD, na súa quinta fase**

No ano 2022 continuarase coa colaboración coas tres universidades galegas para o fortalecemento da Rede Galega de Cooperación Universitaria para o Desenvolvemento (RGCUD), afondando na formación e sensibilización en materia de cooperación para o desenvolvemento coa sinatura dun **convenio anual** de colaboración para o financiamento de actuacións neses eidos, cunha **dotación** prevista de **100.000 €** (40.000 € para o ano 2022 e 60.000 € para o 2023).

O obxectivo xeral deste convenio será o de fortalecer o Sistema Universitario Galego (SUG) como axente de cooperación para o desenvolvemento implicado na consecución dos Obxectivos de Desenvolvemento Sustentable (ODS), mellorando as capacidades da Rede Galega de Cooperación Universitaria ao Desenvolvemento (RGCUD) para liderar a aprobación dunha estratexia común para a implementación da Axenda 2030 nas tres universidades galegas.

✓ **Convenios de colaboración con entidades para actuacións de cooperación no exterior**

Neste ano 2022 está previsto continuar coa **cooperación técnica** en materia de **pesca e acuicultura**, como se vén realizando en colaboración coa Fundación **CETMAR**, ou en materia de **xestión de recursos hídricos**, en colaboración con **Augas de Galicia**, apostando por unha **orientación estratéxica** da Cooperación Galega, financiando proxectos de asistencia técnica que faciliten a transmisión de coñecementos e tecnoloxía aos países do Sur (Perú, Cuba, Mozambique, etc.)

Ao longo do ano, e en función das dispoñibilidades financeiras, poderanse explorar novas vías de colaboración a través dos correspondentes procesos de identificación en diferentes países e sectores, que se instrumentarían por medio da sinatura de convenios de colaboración con aquelas entidades que se consideren máis adecuadas.

### 5.3 PLAN ANUAL DE AVALIACIÓNS

Co obxecto de seguir mantendo o grao de transparencia e de rendición de contas que caracteriza á Cooperación Galega, así como de potenciar a cultura avaliadora e a aprendizaxe colectiva, no ano 2022 darase continuidade á avaliación de proxectos financiados no exterior.

As avaliacións son necesarias por un dobre motivo:

- En primeiro lugar, son un elemento imprescindible para que a política de axuda teña progresivamente unha maior calidade e capacidade de impacto.
- En segundo lugar, porque a política de cooperación lévase a cabo con fondos públicos e é esixible, polo tanto, un exercicio de rendición de contas.

Incidindo nesta necesidade avaliadora, no ano 2022 prevense realizar as seguintes avaliacións:

- As **avaliacións *ex-ante*** dos proxectos que se presenten ao amparo das convocatorias.
- A **avaliación final das intervencións financiadas** dende 2010 na República Dominicana, país destinatario tradicional da axuda da Cooperación Galega.
- **Completar a avaliación final do IV Plan director da Cooperación Galega**, incorporando a análise cualitativa.

### 5.4 ACTIVIDADES DIVULGATIVAS E FORMATIVAS

#### ✓ **Publicación do Informe 2022 da Cooperación Galega**

Ao igual que nos últimos anos, no 2022 editarase en formato dixital o ***Informe 2022 da Cooperación Galega***, que será publicado na nosa páxina web co fin de dar a coñecer á sociedade galega a política de cooperación que se leva a cabo dende Galicia.



✓ **Curso monográfico "A Axenda 2030 para o desenvolvemento sustentable e a súa implementación nas Administracións Públicas galegas" 3ª edición**

Dentro do Plan de formación da EGAP para o ano 2022 impartirase a terceira edición do curso dirixido ao persoal das Administracións autonómica e local e ao persoal das tres universidades galegas, co fin de sensibilizar ás empregadas e empregados públicos e crear conciencia sobre a Axenda 2030 para o Desenvolvemento Sustentable, a cooperación para o desenvolvemento e a acción humanitaria e dar a coñecer o IV Plan director da cooperación galega e a Estratexia Galega de Educación para o Desenvolvemento e a Cidadanía Global.

## **5.5 OUTRAS ACTUACIÓNS**

Co fin de facilitar o acceso dos actores e axentes galegos de cooperación a fontes de financiamento internacional, principalmente da UE, a DXRREE e UE prevé contratar unha asistencia técnica especializada nese ámbito co obxecto de realizar unha análise das posibilidades que se ofrecen ao amparo dos diferentes fondos e programas dispoñibles.

## **5.6 COORDINACIÓN INSTITUCIONAL**

Ao longo do 2022 a DXRREE e coa UE seguirá participando activamente nas reunións daqueles órganos de coordinación institucional dos que forma parte.

- A nivel de Galicia, participarase naqueles espazos que contribúan a unha mellor coordinación e cooperación entre os actores galegos de cooperación, como por exemplo:

✓ **Comisión Interdepartamental de Seguimento da Axenda 2030 en Galicia**

Co obxecto de garantir a coordinación nas accións administrativas e de goberno, necesaria para a consecución dos obxectivos de desenvolvemento sustentable (ODS) da Axenda 2030., seguirase a participar nas reunións da Comisión Interdepartamental de Seguimento da Axenda 2030 en Galicia.



Esta comisión, que foi creada polo Decreto 142/2019, do 31 de outubro, está concibida como un órgano de coordinación e colaboración en materia de sustentabilidade, no que están representados os distintos departamentos da Administración. A presidencia e coordinación desta comisión corresponde á Conselleira de Medio Ambiente, Territorio e Vivenda.

### ✓ **Grupo de Traballo de Educación para o Desenvolvemento e a Cidadanía Global**

O Grupo de Traballo de Educación para o Desenvolvemento e a Cidadanía Global creouse para asesorar e acompañar a implementación da Estratexia Galega de Educación para o Desenvolvemento e a Cidadanía Global.

Consonte ao seu obxecto, este grupo podería reunirse se se estimase necesario ao longo do ano 2022.

### ✓ **III Foro da Cooperación Municipalista da Lusofonía**

A DXRREE e coa UE apoiará e participará no III Foro da Cooperación Municipalista da Lusofonía se o Fondo Galego decide organizalo no 2022, en canto que este foro se está consolidando como un espazo de encontro entre axentes de cooperación municipalista galegos, portugueses e doutros países de lingua oficial portuguesa.

- Igualmente, continuarase a participar activamente nos espazos e iniciativas de coordinación da Cooperación Española:

### ✓ **Comisión Interterritorial de Cooperación para o Desenvolvemento**

A Comisión Interterritorial é un órgano consultivo e de coordinación, concertación e colaboración entre as Administracións públicas que levan a cabo accións de cooperación para o desenvolvemento. Está presidida pola Secretaria de Estado de Cooperación Internacional do Ministerio de Asuntos Exteriores, Unión Europea e Cooperación, Pilar Cancela Rodríguez, e dela forman parte representantes de diferentes departamentos da Administración Xeral do Estado, das comunidades autónomas e das entidades locais.

Participarase nas reunións que se convoquen deste órgano, que previsiblemente serán varias ao longo do 2022, tendo en conta o proceso de reforma no que se atopa inmersa a Cooperación Española.

✓ **Comisión de Seguimento do Convenio entre a Cooperación Descentralizada e a AECID para a actuación conxunta e coordinada en materia de acción humanitaria**

A DXRREE e coa UE participará nas reunións da Comisión que se constituíu para o seguimento do Convenio subscrito entre a Cooperación Descentralizada e a AECID para a actuación conxunta e coordinada en materia de acción humanitaria. A devandita comisión está integrada por representantes da AECID, de cada unha das comunidades autónomas asinantes e da FEMP, e exerce as funcións de coordinación, seguimento, vixilancia e control da execución dos compromisos adquiridos e das actuacións implementadas no marco do convenio.

✓ **Grupo de Traballo de Educación para o Desenvolvemento do Consello español de Cooperación para el Desenvolvemento**

Seguirase participando nas reunións deste grupo de traballo en representación da cooperación descentralizada, co obxecto de incidir no Consello de Cooperación estatal para a toma en consideración deste ámbito específico de actuación.

✓ **Marcos de Asociación País**

No 2022 seguirase participando nas Plataformas de Consulta en Sede (PCS) e dos Equipos País Ampliado (EPA) que se constitúan para a elaboración ou seguimento dos Marcos de Asociación País (MAP) cos países prioritarios para a Cooperación Galega.

✓ **Foro PECE da Cooperación Española**

Seguirase a participar nas reunións que se convoquen no marco do Foro de Planificación e Eficacia da Cooperación Española (Foro PECE), co fin de compartir información co conxunto dos actores de cara a mellorar a planificación e eficacia de todo o sistema.

✓ **Plan anual de avaliacións da Cooperación Española**

Igualmente, seguirase a colaborar coa División de Avaliación da DGPODES (da Secretaría de Cooperación Internacional), participando nas reunións que se convoquen e enviando os informes das avaliacións

que se realicen ao longo do ano, co obxecto de que se recollan no Plan anual de avaliacións da Cooperación Española.

### ✓ **Encontro anual de Comunidades Autónomas e Cooperación**

Como vén sendo habitual, representantes da DXRREE e coa UE participarán na XV edición do Encontro de Comunidades Autónomas e Cooperación, que será organizada no 2022 pola Comunidade Autónoma de Cantabria. Tamén está previsto participar nun encontro intermedio de carácter temático que se celebrará en Canarias no próximo mes de maio e que será monográfico sobre "Cooperación e Migracións".

Estes encontros están consolidándose como espazos de debate e reflexión da cooperación descentralizada española, co fin de buscar canles para unha maior coordinación e complementariedade das accións de desenvolvemento das distintas administracións autonómicas e para analizar propostas de traballo conxunto.

## **6. ORZAMENTO 2022**

O Goberno galego renova o seu compromiso de solidariedade coas persoas e os países máis desfavorecidos **elevando o orzamento para o ano 2022 nun 5,19 %** respecto ao orzamento aprobado no 2021.

No seguinte cadro aparecen reflectidas as partidas orzamentarias previstas para actuacións de cooperación para o desenvolvemento para o ano 2022 por capítulos de gasto do programa orzamentario 331A: *Cooperación Exterior e ó Desenvolvemento*. Ao longo do ano realizaranse aquelas transferencias entre as diferentes partidas que sexan necesarias para facilitar o financiamento das actuacións propostas neste plan.

Os gastos correntes e de funcionamento asociados á competencia de cooperación para o desenvolvemento (que serán financiados con cargo ao programa 111E da DXRREE e coa UE) serán cuantificados ao final do exercicio.

Como nos anos anteriores, ao final do exercicio realizarase a cuantificación das achegas que ao longo do ano poidan realizar outros departamentos da Xunta de Galicia para o financiamento de actuacións en materia de cooperación para o desenvolvemento.

## ORZAMENTO 2022

<b>PROGRAMA 331A: COOPERACIÓN EXTERIOR E Ó DESENVOLVEMENTO</b>		
<b>CAPÍTULO</b>	<b>CONCEPTO</b>	<b>CONTÍA (€)</b>
<b>Capítulo I</b>	<b>Gastos de persoal</b>	<b>584.093 €</b>
<b>Capítulo IV</b>	<b>Transferencias correntes</b>	<b>5.145.584 €</b>
	Institucións sen fins de lucro	572.730 €
	Axudas ás Universidades galegas	115.007 €
	Actuacións de cooperación no exterior	4.099.322 €
	Convenio CGONGD	100.000 €
	Convenio Fondo Galego	60.000 €
	Bolsas formación en cooperación	95.000 €
	SS bolsas formación en cooperación	3.525 €
	Convenio Fondo Humanitario AECID	50.000 €
	Convenio SOGAPS	50.000 €
<b>Capítulo VI</b>	<b>Investimentos reais</b>	<b>70.000 €</b>
<b>Capítulo VII</b>	<b>Transferencias de capital</b>	<b>2.035.208 €</b>
	Actuacións de cooperación no exterior	1.985.208 €
	Convenio SOGAPS	50.000 €
<b>TOTAL Programa 331A</b>		<b>7.834.885 €</b>